

ERRENTERRIAKO ERASOAK GAITZESPEN ETA PROTESTA EKINTZA UGARI ERAGIN DITU

Justizia beldurtu nahi dutela dio EAeko Auzitegi Nagusiak

Donostian ehun bat epaile, fiskal eta Justizia Administrazioako langile elkartu ziren atzo Errenteriako Bake Epaitegiaren aurkako eraso salatzeke. Justiziako Gipuzkoako langileen batzordeak segurtasun neurriak areagotzeko eskatu diote Eusko Jaurlaritzari.


Agentziak / Donostia

EAE-KO Auzitegi Nagusiak gogor gaitzetsi zuen atzo Errenteriako Bake Epaitegiaren aurkako eraso. Erasoaren ondorioz, epaitegiako langile batek, Begoña Landa idazkariak, erredura larriak ditu aurpegian, bi eskuetan eta ezkerreko hankan. «Justizia beldurtu nahi izan dute Botere Judizialarekin zerikusia dutenei eraso eginez. Erasotzaileek uste dute justizia eta askatasun baloreak zapalduz beren miseria etikoa zabal dezaketela, baina euskal herritarrek jakin behar dute Justiziaren esanetara gaudenok balore horien defentsari eutsiko diogula, modu sosegatuan eta objetiboan», adierazi zuen Justizia Auzitegi Nagusiak ohar baten bidez.

Donostian, ehun bat epaile, fiskal, idazkari eta langile elkartu ziren Justizia Jauregiaren aurrean Errenteriako erasoagatik protestan. Kontzentrazioa Gipuzkoako Justizia Administrazioako langile batzordeak antolatu zuen, eta han egon ziren Luis Navajas Gipuzkoako fiskalburua eta Jose Luis Barragon Auzitegiako lehendakaria. Protesta ekin-tzan bildutakoak ordu erdi inguru egon ziren, isilik, Justizia Jauregiako sarrera nagusian, San Martin kalean. Ordu berean LAB sindikatuak beste manifestaldia egin zuen HBko Mahai Nazionalako burukideek espetxeratzeko erabakiaren kontra. LABeko manifestatzaileak Justizia Jauregira hurbildu eta aurrez aurre jarri ziren. Kontzentrazioaren amaieran tentsio uneak egon ziren, LABekoak oihuak hasi baitziren, baina ez zen istilurik izan.

Langile batzordeak erabateko elkartasuna adierazi zion Begoña Landari, eta Errenteriako Bake Epaitegiaren aurkako eraso gaitzetsi zuen, horrelako ekin-tzak herritarrentzat ezezik, erasotzaileen helburuentzat ere kaltegarri direla uste baitute. Donostiako langileek, behin berriro, segurtasun neurriak areagotzeko eskatu zioten Eusko Jaurlaritzari, aurrerantzean horrelako beste erasorik gerta ez dadin. Justizia Administrazioako langileek beste kontzentrazio bat egingo dute etzi eguerdian. Artzain Oneko plazan elkartuko dira eta, ordubete egon ondoren, lanuztea egingo dute.

Joakin Gimenez Bizkaiko Auzitegiako lehendakariak ere aipatu zuen Justizia Administrazioako langileen segurtasuna areagotzeko premia, baina erabateko segurtasunik ez dagoela eta, ondorioz, Errenteriako bezalako erasoak eragozteko oso zaila dela ohartarazi zuen. Gimenezen iduriko, Errenteriako eraso



Donostiako Auzitegiaren aurrean egin zuten protesta Justizia Administrazioako langileek. Leku berean bukatu zuen manifestaldia LABek.

ANTONIO ALONSO / EFE

Gipuzkoako Justizia Administrazioako langileek ordubeteko kontzentrazioa eta lanuztea egingo dute astelehenean

«ETak Euskal Herriari inposatu nahi dion terrorerearen diktaduraren beste kapitulu bat da», eta ez dago esaterik jauzia izan dela, «jauzia lehendabiziko pertsona hil zutenean eman zutelako». Gainera, indarkeriaz baliatzen direnen helburua herritar guztiak ikaratzeko dela eta, horregatik, denek erne egon behar dutela azpimarratu zuen, «inor ez baitago besteak baino seguruago». Bizkaiko Auzitegiako lehendakariak Zamudion egin zituen adierazpenok, Delclaux eta Ortega Lararen bahiketaren aurkako protestaren ondoren.

Espainiako Botere Judizialeko Kontseilu Nagusiak, agiri batean, elkartasuna adierazi zion Begoña Landari, eta ziurtzat jo zuen Justizia Administrazioako langileek ez dietela amore emango «biolentoen presioei». Aitzitik, Justiziarekin zerikusia dutenek Konstituzioaren eta askatasunaren alde tinko jarraituko dutela azaldu zuen.

Demokraziarako Epaileak taldearen ustez, ekintza beste urrats bat da euskal epaileei presio egiteko kanpainaren barruan. «Justizia eta gizarte osoa ikaratu nahi dute, baina behin

berriro esan behar dugu ez dutela lortuko». Talde horrek duela 60 urte Hitlerren aldeko gazteen alderatu zituen Errenteriako erasotzaileak, «haiek bezala, gazte erradikalek babesik ez dutenei, ahulenei, egiten diete eraso, liburuak eta pertsonak su emanez». Demokraziarako Epaileek lanean segituko dutela nabarmendu zuten, «Euskadin ez daitezen nagusitu gizarte faxista ezarri nahi dutenak».

Espainiako Justizia Sindikatu Independentek ere ohar bat kaleratu zuen Errenteriako Bake Epaitegiaren aurkako eraso gaitzesteko eta, bide batez, langileek behar bezalako babesik ez dutela salatzeke. Epaitegi gehienetan inolako segurtasun neurririk ez dagoela eta, horrenbestez, langileak arriskuan daudela azpimarratu zuen Justizia Sindikatu Independentek.

Ertzaintzak Joseba Leizeaga atxilotu du Errenterian

ERTZAINTZAK Joseba Leizeaga Leizea atxilotu zuen atzo eguerdian Errenterian. Leizeaga etxean bakarrik zenean joan ziren ertzainak bertara, eta atxilotakaren berri plazaratu zen gertaera ikusi zuten lagun batzuen bidez. Izan ere, Joseba Leizeagaren gurasoak atxiloteta egiaztatzen saiatu ziren arren, ertzainek esan zieten ko-

misarian ez zegoela, hori besterik ez.

Atxilotakaren lekuko arabera, Joseba Leizeagari zer leporatzen zioten galdetzeko aukera izan zuten, eta hark «epaitegiagatik» erantzun omen zuen. Beraz, antza denez, Ertzaintzak joan den ostegunean Errenteriako Bake Epaitegiaren aurkako erasoarekin zerikusi izatea lepora-

tzen dio. Eraso horretan epaitegiako idazkaria zaurituta geratu zen. Hala ere, Ertzaintzak atzo arratsaldean ez zuen atxilotetari buruz inolako informazioirik zabaldu, eta, beraz, ez da segurua Herrizaingo Sailak hori leporatzen dionik.

Ertzaintzak Leizeagaren etxetik hark lanerako erabili ohi dituen ordenadorea, eskane-

rra eta beste zenbait material eramane zioten. Joseba Leizeaga marrazkilaria da, eta ordenadore bidez hainbat lan egin izan ditu, eta horregatik zituen ordenadorea eta beste-lakoak etxean. Leizeaga ezaguna dira Errenterian, baita bere lanak ere, esaterako, Oiarzuntzen dagoen harrizko bisontearen egileetako bat izan zen. X

Begoña Landaren osasunak hobera egin du

Begoña Landak, Errenteriako Bake Epaitegiaren aurkako erasoan zauritu zuten langileak, hobera egin du, Arantzazuko Andre Mariren ospitaleko iturriek jakinarazi dutenez. Hala ere, aurpegian, bi eskuetan eta ezkerreko hankan dituen erredurak, bigarren graduak, larririk dira oraindik. Atzo sueroa kendu zioten eta zauriak garbitu zituzten berriro. Begoña Landa, 51 urtekoa, Errenteriako Bake Epaitegiako komunean zegoen bost erasotzaileak sartu zirenean. Erasotzaileek, aurpegia estalita zutela, irteteko esan zieten Epaitegiako langileei. Langileak ateratzen ari zirenean erasotzaileei esan zieten beste lankide bat komunean zegoela, baina haiek ez zuten hura irten arte itxoin eta molotov koktelak jaurti zituzten.

Errenteriako Udalak soseguz erantzuteko eskatu die herritarrei

Errenteriako Udaleko bozeramaileen batzordeak herriko Bake Epaitegiaren aurkako eraso gaitzetsi zuen atzo, eta herritarrei soseguz erreakzionatzeko eskatu zien. Errenteriako Udalaren iritziz, «biolentzia terroristak herrian eragin duen egoera eramangaitza» da, eta horri aurre egiteko ezinbestekoa da, indarrez jokatzeko dutenak isolatzea. Bakea lortzekotan, elkarbizitza baketsuaren, tolerantziaren eta legearen eskutik etorriko dela aipatu zuen. Errenteriako Udalak azaldu zuenez, ekin-tza biolentoen erantzule bakarrak ez dira koktelak botatzen dituztenak, «euren ideiak txantajearen eta beldurraren eraginez inposatu» nahi dituztenek ere badutelako ardura. Udalaren oharra PSE-EE, EA, EAJ, IU eta PPko ordezkariak botoekin onartu zuten.

LAB sindikatuak «atsekabeturik» agertu da erasoaren ondorioengatik

LAB sindikatuak Justizia saila atsekabeturik agertu zen Begoña Landa lankideak izandako zauriengatik, eta lehenbailehen senda dadila opa zion. Sindikatu horren iritziz, eraso ez zen Justizia Administrazioako langileen kontra izan Botere Judizialaren aurka baizik. «Eta, bistan da, langileak ez gara Botere Judizialeko parte», gaineratu zuen. LABek «Euskal Herriaren eta Espainiako Estatuaren arteko gatazkaren» ondorioztat jo zuen Errenterian gertatutakoa, eta negoziaketaren bideari ekiteko eskatu zion Gobernuari.